

La Lettre Jèrriaise, Sanm'di lé17 d'Avri 2021.

Bouônjour tout l' monde, ch'est Françouais L'Maistre tch'a l'pliaisi dé vos présenter la Lettre Jèrriaise, aniet, Sanm'di lé 17 d'Avri 2021.

Né v'là bein vite l'Annivèrsaithe dé la Libéthâtion eune autre fais, et ch'est la 76^{ième} ch't année. Pouortchi, j'ai pensé dé vos donner deux'-trais pensées dé chein qué j'mé rappelle dé l'Otchupâtion quand j'tais qu'un mousse.

Ma preunmié mémouaithe est d'eune pronm'nade dé la maiethon tchi 'tait nommée, Florida Villa à St. Ouën, pas bein liain dé Portînfé. Pus souvent, la hêmie à la route 'tait freunmée, mais chu jour là, mes pathents l'avaient laissi ouverte et, comme j'tais tchuthieux, mé v'là hors en ava d'la route pour visiter ma Grand Tante Vîne et Papa Ph'lippe à lus fèrme au Carrefour dé Portînfé. Mais, j'tais pon à marchi, j'tais dans ma p'tite avion à trais reues, tch'avait les rondelles du RAF, peintes sus les ailes et lé ventre dé l'avion. Quand j'arrivis au carrefour, bon, i' y avait deux soudards Allemands à lus entre pâler dans l'mitan d'la route. Tout d'un co, né v'là iun d'ieux tchi s'êboufli à rithe et pointit dans ma direction. Jé n'savais pon pouortchi qui 'tait à rithe, mais ch'tait san doute dé chu p'tchiot auve sén avion du RAF tchi s'n allait tither touos l's Allemands. Mé v'la èrentré dans l'bel dé ma tante et j'lus d'mandit pouortchi qui 'taient à rithe, mais i' m' fitent la minne dé rein et ch'tait bein d's années auprès qué j'découvris la raïson.

Et pis, quand j'tions à d'meuther à La Frontièthe à Ste. Mathie, j' m'en rappelle qué 'Douard et mé, j'taîmes endormis dans nouotre chambre à haut quand lé son comme des pétards nos rêvilyit. Nos v'là les deux d'but pour vaient tch'est qui s'arrivait, pace qué j'n avions pon d'ridgieaux dans la f'nêtre et nou pouvait vaie lé ciel dé nouotre liet. Tout l'ciel 'tait illeunminé. J'tions touos les deux êmèrvilyis! Nos v'la les deux à la f'nêtre pour découvri tch'est qui s'arrivait. l' y avait des feux d'artifices partout l'ciel. J'lé savions pon, mais les Allemands

'taient à tither sus ieune dé nos avions alliées dé lus nid dé mitrailleuses à St. Louothains. Ch'tait excitant pour des avièrs comme nous, et pis tout d'un co, né v'la man p'pée tchi nous happe les deux par la pé du co et nous dis dé nous couochi dêliêment et dé né pon r'aller à la f'nêtre eune autre fais. Et pis, lé lendemain, i' nous montrit les morcieaux dé fé dans l'gardîn des cartouches tch'avaient êcliaté dans l'ciel la séthée dé d'avant. Du shrapel ! Tchi hôrreu!

Et pis, eune autre chose qué j'mé rappelle, dans nouotre grand' tchuîsinne à Ste. Mathie, j'avions deux grandes tchaises dé chaque côté du feu. Souos les tchaises, i' y avait des tapis. Et pis, si nou l'vait l'tapis souos la grand' chaise à la drouaite, nou-s-avait eune trappe et quand nou-s-ouvrait chute trappe, et bein, i' y avait un creux et un p'tit radio muchi là. Ch'est comme chonna qué mes pathents, comme bein d'autres, êcoutaient les nouvelles dé la dgèrre et d'L'Angliéterre.

Et bein, n'en v'la assez pour aniet. J'vouos en dithait pus au sujet dé mes mémouaithes eune autre fais.

Ayiz tous eune bouonne sémaine et restaient sain et sauf. À bi.